

Festival di Dande awenochi

Dedica na Aiky Croes

ORANJESTAD(AAN):--E homber di cultura, Aiky Croes tra ser homenagea awe nochí durante di 30 festival di Dande den Club Caiquetio.

Hopi aña prome cu Harry Croes y su comision a cuminsa cu festival di dande, tabata tin varios cabayero cu a forma grupo di dande cu tabata deleita famianan cu e bunita y sagrado canto di Dande pa pidi bendicion den cas y tur clase di exito den e aña cu a caba di habri.

Den e varios personanan aki a topa cu Mario "Aiky" Croes, kende na edad di 14 aña ya tabata sigui pasonan di e generacion di pasado cu e mensahe di canto di aña nobo cu ta nos Dande.

Sr. Aiky Croes tabata tamborero di e grupo di Shon pa lopez kende tabata toca sinfonia di boca, despues Theolindo Lopez di revista Eoulevard a bin cu sinfonia di man hunto cu Cobi Koolman, Betty Albertsz, Benedicto Lopez y e rumannan Frans y Mario Croes.

Un grupo di Dande cu tabata

consisti di hobennan, pero aprecia y respeta na tur cas cu nan a pasa cu paranda.

Algun tempo despues Sr. Aiky Croes a logra haya e oportunidad pa forma parti di e grupo di dande di nos grandinan bao direccion di e violista Sr. Hemmy Croes cu ta omo di Aiky, hunto cu su tata Panchico Croes, Deshi y Juchi Croes y e cantantenan Belin Maduro y Chimi Croes. Tur e componentenan di e grupo a muri.

Na aña 1959 cu regreso di Betico Croes for di Hulanda a lanta un otro grupo di Dande cu a carga e nomber di Betico y su Grupo cual grupo actualmente ta Grupo di Betico.

Sr. Aiky Croes a sigui e tradicion di su ruman Betico pasando Dande na hospital deseando tur patient un pronto recuperacion y cu Dios drama su bendicion riba nan.

Aki hunto cu e grupo di Betico a pasa paranda den tur distrito di Aruba sin conta su presentacionnan den exterior e.o. na Hulanda, Belgica,

Alemania, corsow, Bonaire, y Cuba hibando nos folklore internacional.

Na Aruba el a canta den varios festival e.o. na Connie Francis Club, tereno di feria na Santa Cruz y La Fama, Trappers y Caiquetio Club.

Sr. Aiky Croes, un cabayero tur afo, homber di cultura, a sostene Dande grandemente sea como musico, cantante uy financieramente cu promocion via revista, corant, radio y television.

Aiky a nace dia 12 di juli 1940 y ta yiu di Sra. Mimita y don Panchico Croes y alavez ruman di Libertador Betico.

Aiky ta doño di savaneta Coastal Service Center cu recientemente a cumpli 50 aña dunando servicio na comunidad Arubano.

Cu tur honor di 30 festival a ser dedica na Sr. Aiky Croes pa su aporte grandi na Dande.


Na su yiu, rumannan, familianan y componentenan di Grupo di Betico, comision organizador festival Dande, propio composicion y Tipico,

ta extende palabra di danki na Aiky pa conserva nos Dande pa hopi aña y alavez pabien cu e honor aki y cu Dios protehe, bendiciona pa e sigui

mantene nos cultura, folklore y tradicion arubano na halto. Un abrazo fuerte di bon aña na Aiky y su familia na nomber di comision organizador di Dande.

Parlamentario Mervin Ras:

**Trinta aña di festival Tipico,
Dande y propio composicion ta un
logro grandi, danki na Harry Croes**



ORANJESTAD (AAN)—

En conexcion cu 30 aña di e celebracion di festival tipico, di dande y propio composicion, Parlamentario Mervin Ras ta felicita henter pueblo di Aruba, muy en especial na Sr. Harry Croes, su comision y sostenedornan pa e logro grandi aki.

E parlamentario ta considera

30 aña aki como un logro mirando e desaroyo cu tabata tin den nos comunidad den añanan 70 unda dande y musica tipico tabata desapareciendo. "Den e añanan aki, musica for di exterior tabata hayando hopi mas atencion cu nos propio

sigui lesa pg 28

continuacion pg 27

musica. Ta Sr. Croes a tuma e iniciativa di organiza e prome festival di musica tipico, di dande y di composicion propio na Aruba, locual a inspira otro organizacionnan tambe pa duna valor na nos propio musica y composicionnan.

Den e añanan 70 tambe a lanta Movimiento Electoral di Pueblo, cual semper a duna valor na su hendenan, nos propio cultura y identidad. Meymey di e lucha pa nos Status Aparte, hiba door di partido MEP, a lanta tambe consenshi di nos pueblo pa aprecia loke ta di nos. cu dedicacion y perseverancia, Sr. Harry Croes a continua tur e añanan cu e organizacion di e festival te cu awe e ta un evento grandi y hopi bunita pa un y tur. Por bisa cu durante e festival hopi talento scondi a ser descubri cu despues a resulta di bira artistanan grandi y conoci tanto pa nos pais como den exterior.

Por bisa cu den gobernacion actual Minister di Labor,

Cultura y Deporte, den su maneho ta poniendo enfasis Aruba desaroyo di nos cultura y folklore, locual ta necesario mirando e desaroyo economico y cultural acelera cu nos pais ta aden, en bista di un cantidad grandi di inmigrantenan cu ta bin biba na nos pais pa traha. Aki ta necesario un maneho dirigi ariba conservacion di nos cultura y integracion di otro culturanan. Por bisa cu gobierno por stimula y fortifica e desaroyo di nos cultura, folklore y tradicionnan, pero cu ta depende tambe di iniciativanan particular pa fortifica esaki".

Segun parlamentario Ras, organizacion di festival tipico y di dande ta un di e iniciativanan aki. Ras ken for di chikito a bishita e festival aki ta felicita un biaha mas Sr. Harry Croes, su comision y tur otro boluntarionan cu ta pone man na obra pa yuda pa e evento grandi aki tuma lugar tur aña pa asina keda conserva tur locual ta di nos.

Ken ta Mario "Aiky" Croes

Aki ta sigui un relato riba e persona Aiky Croes, na kende festival di dande 2003 ta wordo dedica awe noch.

Aiky a nace di un familia humilde dia 12 di juli 1940 (63) na Santa Cruz,

E tata di Aiky, Francisco "Panchico" Croes hunto cu e mama di Aiky, Mimita Croes a cria un total di 13 yiu.

Cu su 14 aña di edad, Aiky a cuminsa ta pasa e paranda di aña nobo den Santa Cruz manera por lesa tambe den otro articulo di dedicacion acopaña pa su amigonan di infancia, Shon Pa Lopez, Theolindo Lopez, Cobi Koolman, Betty Albertz, Mario y Frans Croes.

Aiky tabata pasa cas pa cas y na pia.

Semper e tabata gusta toca su tambora, aunke e tabata yuda cu e wiri ora cu tin mester.

Sinembargo no a dura mucho cu su conhuntito di infancia a spat for di otro pa motibo cu mayoria di e integrantenan a bay studia den exterior.

Despues di esey Aiky tabata forma parti di e paranda di fin di aña di su omo Sr. Hemmy Croes. (q.e.p.d.).

Aki nan atrobe Aiky a haya e tarea di tamburero y hunto cu entre otro su tata Francisco,



su omo Hemmy, Sr. Deshi y Juchi Croes (q.e.p.d.) y e cantantenan di Dande Sr. Chimi Croes y Belin Maduro (q.e.p.d.) Aiky tabata brinda famia y conociman cu e tradicional Dande.

Sinembargo, e agrupacion aki tampoco a dura hopi aña pa motibo cu e alma di e conhuntito, Sr. Hemmy Croes a bay biba na Corsow.

A dura te cu 1959 cue ruman di Aiky, Betico Croes ta bolbe di Hulanda y mesora Betico a forma un agrupacion di famia pa deleita famia, bisiña y amistadnan cu e tradicional

paranda di fin di aña.

E rumannan, Betico, Efrain, Aiky, Hendrik, Rudy, Tommy hunto cu Sr. Janchi Werleman, Bibiano Lopez, y Maiky Croes, tabata reuni despues di tiro na cas di Francisco Croes pa di eynan pasa duna tur bisiña y familia e bon deseonan di aña nobo.

Acompaña pa tur e rumannan muher y nan respectivo casanan e paranda aki a haya e apodo di "Kibra Stock" pa e cantidad di hendenan cu tabata sigui e paranda aki..

sigui lesa pg 29

continuacion pg 28

E parandanan aki tabata dura tin biaha 4 te 5 dia. Tabata tambe custumber di Aiky hunto cu e grupo encabeza pa Betico, pa bishita hospital y pasa camber pa camber pa duna nos hendenan malo e saludo di aña nobo.

E no ta un secreto cu e grupo tabata drenta hospital 2 or atardi y ta sali di hospital 10 or anochi.

Aiky hunto cu Betico tabata tin e custumber di subi pa Savaneta, Brazil, y San Nicolas y pa despues ora cu mainta habri bin sigui cu e conocirnan den Santa Cruz.

Poco poco e sobrinonan ta caba nan estudio den exterior y e agrupacion ta haya miembronan nobo den persona di Ruben Werleman, Maikito Croes, Jonchito Croes, Rodney Lopez, Hildward Croes y Goswin Oduber.

Sinembargo te cu e tempo ey ainda e agrupacion no tabata tin nomber fiho.

Aiky ta sigui conta cu e ta corda cu un aña nobo atardi na aña 1973, cu e tabata hunto cu e grupo pa cuna e saludo di aña nobo na su ruman muher Ada ey mes pazuid di oficina di MEP na Santa Cruz, ta unda Harry Croes a presenta y despues di a scucha e dande di e grupo, Harry a yama Betico

bin tende cerca dje na auto. Aki Harry y Betico a hiba un combersacion basta extenso. Despues Aiky ta sigui relata cu el a compronde for di Betico cu Harry mescos cu Betico tabata sumamente decepciona pa motibo cu e tradicionnan di mas dushi di e pueblo di Aruba tabata na punto di desaparece, esta e Dande.

Nos tur por corda e famoso fiestanan di club despues di tiro.

E bendita fiestanan ey a pone cu ningun hende a worry mas pa paa nan dande ya cu ta para toca y canta te cu nan campana ta cay sin cu tin ningun hende na cas pa ricibi nan.

Ya cu tur hende tabata na e fiestanan di club despues di tiro.

Betico e aña nobo ey a vocifera su preocupacion na Harry y a priminti di bay haci algo na e problema ey.

Betico a priminti Harry tuyr su cooperacion.

Enverdad, e aña siguiente Harry Croes a organiza e prome festival di dande cu a ser inaugura den Connie Francis Club na Santa Cruz.

Un Connie Francis Club pata pata di hende cu a bin presencia e prome festival di dande cu a conta tambe cu



participacion di e Conhunto Folklorico Arubano di sr. Mo Tito Croes.

E grupo den cual Aiky tabata pertenece a presenta cu nan uniform colorido y esey a duna e otro gruponan smaak pa e añanan siguiente nan tambe haci nan presentacion den un forma uniforma.

Na e momentonan ey e agrupacionnan cu Aiky tabata forma parti di dje tabata den necesidad urgente di un nomber pa participa cune.

Spontaneamente tur hende a cumenza yame, "Betico y su grupo" y hasta den reunion di presupuesto Sr. Watty Vos tabata desea Sr. Betico Croes exito cu su agrupacion na e festival di Dande e mes anochi en cuestion.

Desde comienzo di festival di dande, Aiky hunto cu e agrupacion tabata presenta na tur festival cu excepcion di e aña cu Betico Croes a fayece y na un otro ocasion cu e agrupacion a keda descualifica pa motibo cu nan a yega laat.

E yegamento laat aki tabata pa motibo di un otro compromiso cu e arupo tabata

tijn.

E tempo nan ey Betico y su grupo tabata tin como cantante Sr. aiky croes, y despues Sr. Maiky Croes, y Janchi Werleman q.e.p.d.

Segun e generacionnan nobo tabata crece, e cantidad di integrantenan di e conhunto tambe a sigui crece.

Sr. Hildward Croes, Maikito croes, Ruben werleman, Rodney Lopez y gos Oduber a bira integrantenan nobo di e agrupacion.

Mester menciona cu Aiky croes tabata e cantante di Dande pa Betico y su grupo. Aiky a canta pa prome biaha na Connie Francis Club y despues tambe den tereno di feria na Santa Cruz, riba tereno di La Fama na Savaneta, na Trappers Club, y por ultimo na tres ocasion na Club Caiquetio na Paradera.

Segun Aiky ta conta, e tempo ey nunca Betico y su Grupo tabata cay den premio pa motibo cu e grupo tabata un spontaneo cu no tabata conoce mucho profesionalismo.

Ta despues di fayecimento di betico e grupo a conoce poco profesionalismo bao direccion di Hildward Croes.

Tabata e momentonan ey tambe cu Sr. Maikito Croes a haci su entrada como cantante fiho di dande hunto cu su tata Sr. Maiky Croes.

Akinan Aiky a pasa man atrobe pa su acostumbrado

tambora cu ta e instrumento cu mas a fascine den su hubentud.

Cu e agrupacion "Betico y su Grupo" cu despues di fayecimento di Betico a bira "Grupo di betico", Aiky a bishita varios pais como integrante di e grupo.

El a bishita entre otro Hulanda na 3 ocasion, entre nan Aruba Dag, un biaha na bolsa di Alemania, un biaha na bolsa di Belgica, un biaha na festival na Cuba, 2 biaha na Bonaire Dia di Rincon, y un biaha den actividad cultural na Corsow.

Aiky ta gradici Harry Croes inmensamente y dune un abrazo fuerte hunto cu su familia cu e di 30 edicion di Festival di dande, cu ta awe nochi.

Tambe e ta menciona Sr. Mooi Geerman q.e.p.d. kende sin ningun interes tabata man drechi di Sr. Harry Croes durante hopi aña do e festivalnan y ta gradici e comision organizador cu a corda riba loke Aiky a nifica pa e tradicion di fin di aña, esta Dande.

Na e integrantenan di Grupo di Betico tambe a bay palabranan di gradecimento pa motibo cu sin nan Aiky no por a logra yega asina leeuw. "Na boso tur y mas cu tur na Todo Poderoso, masha danki y laga nos bisa, biba biba biba aña Nobo", ta palabranan di Aiky.